



ATASSUT
Siverth K. Heilmann

20. oktober 2020
UKA 2020/119

Immap naasuinik tunisassiornerup pilersinnissaanut annertusarnissaanullu tunngatillugu misileraanernut aningaasaliissutaasartussat siunertamut tulluarnerusumik qanoq ilusilerneqarsinnaanerat atuutsinneqarsinnaanerallu pillugit nassuiaammik Naalackersuisut saqqummeqqullugit peqquneqarnissaannik Inatsisartut aalajangiiffigisassaattut siunnersuut. Ilaatigut kommunit inuussutissarsiortullu misilittagaat nassuiaammut ilaatinneqassapput. Nassuiaat UKA2021 sioqqullugu Inatsisartunut agguanneqassaaq, taamaalilluni nassuiaammi inerniliunneqartut AIS2022-ip suliarineranut ilanngunneqarniassammata.

(Partii Naleqqap, Inatsisartunut ilaasortaaitai)

Siullermik Partii Naleqqap, Inatsisartunut ilaasortaaitaanut qujanaq, inatsisartunut aalajangiiffigisassatut siunnersuuteqarnissinnut, imatullu Atassummiit oqaaseqarfigissavarput.

Siulersuagut immatta naasuinik (qeqqussanik taasakkagut) inuussutissaqarluartunik nerisaqarluartarsimaneri tusartaannarpagut. 1990-ikkut ingerlanerani Maniitsoq aalisarnermut tunisassiornermut Ilinniarfeqarallarmat (ATI) suleqatigalugu, kommuune kommunalbestyrelsemi ilaasortanik atorfilittallu, Island, Savalimmiunut il il misilittakanik paasisassarsiortinneqartarnikuupput.

Imartatsinni qeqquarpassuit annertoorejussuit pingaartumik qassusersornermi iluaqutigineqaratik akornutaaneri allanngortikkusullugu, namminersortunut tunisassiaralugit aningaasarsiutinngortinnissaalu siunertaralugu oqallisigiinnarnagit pilerisaarutigisarsimavagut, ajoraluartumilli aporfinnik assigiinngitsunik peqquteqarluni kajumilersitsiniarneq iluatsitsiviusarsimanngilaq.

Atassummiit aningaasarsiorfiusinnaasunik suliffinnillu nutaanik pilersitserusuttunut tapersersuilluta politikkeqarnerput ilisimaneqaatigaarput, taamaattumik Partii Naleqqap, Inatsisartuni ilaasortaaitaasa aalajangiiffigisassatut siunnersuuteqarnerat pinngitsoorani piviusunngornissaanut Inatsisartuni politikikkut tamakkiisumik tapersersorneqarnissaa pisariaqavinnera Atassummiit tapersersorparput.

Aalisakkat piniakkallu tammakartarput aningaasarsiornerpullu sunnerneqarnerluttarluni. Immap aalarujussuarnerata kingunerisaanik, kangerlunni avataanilu qeqquarpassuit tunitsivissaqaraanni aaginnarneqarsinnaapput. Nunani allani annertoqisunik tunisassiortoqarnera aningaasarsiutigineqarnerilu siunnersuuteqartut paasissutissiipput, sooq uagut iluaqutigissanngilagut.

Taamaattumik Naalackersuisut nassuiaasiornissamut peqquneqarnissaannik aalajangiivinnissamut siunnersuut tamakkiisumik Atassummiit isumaqatigaarput, suliallu aappassaaneerneqartigani aalisarnermut piniarnermullu ataatsimiititaliami peqqissaarullugu suliareqqaarneqarnissaa innersuussutigaarput.